



20 okt 2022

UKA 2022 /88

Angerlarsimaffinni varmepumpenik aammalu solcellinik pilersitsinissamut pitsaaqutit aammalu ajoqutit misissornissaannut Naalackersuisutnassuiaammik suliaqarnissaat pillugu aalajangiiffigisassatut siunnersuut ,Inatsisartut EM 2023 kingusinnerpaamik tunniunneqassaaq

(Nivi Olsen Demokraatit)

Siumumiit siunnersuuteqartoq siunnersuutaanut qutsavigaarput, imatullu oqaaseqassalluta.

Siumumiit ilisimaarilluinnarparput silaannaap pissusaata allanngoriartornera inuiassuit pisuussutigigipput, taassumallu pakkersimaarneqarnissaa pillugu suliniutit assigiinngitsut ingerlanneqartut soqutigilluinnarlugit periarfissatigut suleqataaffigisinnaasatsigut, aammalu iliuuserisinnaasatta iluini piviusunngortitsinissamut annertuumik kajumissuseqaratta.

Soorlu partiitta anguniagaasa ilaat imaattoq issualaassuara: Erngup, anorip seqernullu nukingi atorlugit kiisalu brintimik nukissiorneq atorlugu nukissiorneq annertusiartortinneqassaaq, nunatsinni inuussutissarsiornermut aningaasaqarniarnermullu oqilisaataasumik, CO2-mik aniatitsinerup annikillisarneranik tamanna kinguneqassaaq.

Siunnersuuteqartup angerlarsimaffinni varmepumpinik, kiisalu solcellinik pilersitsinissamut Naalackersuisut pitsaaqutit ajoqutillu pillugit nassuiaammik suliaqarnissaat kissaatigaa, tamanna tunngaviatigut Siumumiit ilalerparput.

Nukissiuutit mingutsitsiffiunngitsut atugaalernerunissaat siunissamut ingerlanitsinni peqataatillugit inerisartuartaqartut isumaqarfigaagut, maannalu tassunga ikaarsaariartornerput ingerlasoq takusinnaavarput, tassa Naalackersuisut akissutaani annertusaanissat Utoqqarmiut kangerluarsunnguanni, aammalu Qasigianguani Aasiannilu pilersuinissamik pilersaarutit eqqarsaatigalugit ingerlavik toraagarput naammagisimaarparput, aammattaarli ilisimallugu nukissiuutit allat taaneqartut soorlu siunnersuuteqartup taasai seqernup qinngorneraneersut suli inerisartuarnissaat, aammalu siunissaq eqqarsaatigalugu atuinnissap annertusarneqarsinnaanera pillugu tusagaqartarnissat pissangagalugit utaqqissuagut.

Iluarisimaarparput Naalackersuisut akissutaanni kiak atorlugu pumpinik kissamik atuinerunissaq aamma soqutiginarlutut taallugu ilisimasatta qaffasinnerunissaat pillugu oqariartormata iluarinartuuttipparput tamanna.

Naalackersuisut allannguutissamik siunnersuutaat tunngaviatigut ajorinngilarput, malugalugu pilersaarummik suliaqarniarneq siunniussimammassuk taamaasilluni siunnersuutip pimoorunneqarnera ersersimassuk, pilersaarutillu UPA 2024-mi tunniunneqarnissaa ilalerlutigu.

Taamatut oqaaseqarluta siunnersuut taperserlugu ataatsimiititaliamut susassaartumut oqaluuserineqarluarnissaa siunertaralugu ingerlateqqipparput.

Jens Kristian Therkelsen Siumut